



CONVENIO DE COLABORACIÓN ENTRE A AXENCIA GALEGA DE INFRAESTRUTURAS E O CONCELLO DE REDONDELA PARA A MELLORA DA TRAVESÍA DA PO-323, PPQQ 0+840 A 1+840

Santiago de Compostela, 12 de maio de 2017

REUNIDOS

Dunha parte, Ethel Ma Vázquez Mourelle, presidenta da Axencia Galega de Infraestructuras, facultada para a formalización deste convenio polo Decreto 173/2011, do 4 de agosto, polo que se aproba o estatuto da Axencia Galega de Infraestructuras.

Doutra parte, Javier Bas Corugeira, na súa condición de alcalde do Concello de Redondela, actuando en virtude das facultades representativas que lle atribúe o artigo 21.1 b) da Lei 7/1985, do 2 de abril, reguladora das bases do réxime local.

Ambas as dúas partes recoñécense mutuamente na calidade en que interveñen con capacidade legal, suficiente e necesaria para o outorgamento do presente convenio de colaboración e, a tal efecto

EXPOÑEN

Primeiro. A estrada PO-323 Chapela (N-552) - Vigo, pertencente á rede secundaria da Xunta de Galicia. No treito desta estrada que discorre polo núcleo de Chapela, entre a N-552 e o límite co termo municipal de Vigo, o funcionamento normal do tráfico vese entorpecido pola imposibilidade de realización de cambios de sentido e o elevado tráfico pesado consecuencia da actividade industrial da zona.

Segundo. A Axencia Galega de Infraestructuras ten entre os seus obxectivos a mellora da rede viaria de Galicia, a ordenación do territorio e a súa cohesión, de xeito que se proporcione ás persoas usuarias unha rede eficaz,



cómoda e segura, fomentando as relacións municipais e intermunicipais na procura e no fomento dun desenvolvemento harmónico.

Terceiro. O Plan de Seguridade Viaria de Galicia 2016-2020 ten como obxectivo estratéxico 2 a consecución de vías de tránsito e mobilidade máis seguras.

Cuarto. A Axencia Galega de Infraestructuras, dentro da súa planificación en materia de estradas, está a executar a obra "Reforma da travesía da PO-323, do pq 0+840 a 1+840", de clave PO/16/069.06.

Quinto. Coa reurbanización da travesía, que incluírá o incremento da anchura das beirarrúas para facelas accesibles, e a reforma dos servizos de drenaxe, saneamento, abastecemento e alumeadado público acadarase unha mellora funcional e de seguridade viaria da estrada.

Sexto. O concello de Redondela ten interese na execución da actuación polo que participará no seu financiamento cunha achega económica.

Sétimo. A Axencia Galega de Infraestructuras, en colaboración co Concello da Redondela, trata de fomentar aqueles investimentos que resolvan problemas nas infraestructuras, coa finalidade dun desenvolvemento económico e social que aporte unha maior calidade de vida á cidadanía.

Oitavo. Os convenios entre administracións públicas constitúen o elemento adecuado para desenvolver a súa cooperación en cuestións de interese común, tal e como establecen o artigo 57 da Lei 7/1985, do 2 de abril, reguladora das bases de réxime local e o artigo 198 da Lei 5/1997, do 22 de xullo, de administración local de Galicia.

Considerando a confluencia dos intereses das partes comparecentes, faise preciso artellar as bases para a óptima coordinación e así regular a colaboración nas súas actuacións. Para o fin mencionado, formalízase o presente convenio con suxeición ás seguintes



CLÁUSULAS

PRIMEIRA. OBXECTO

O obxecto do presente convenio é establecer as bases da colaboración económica entre a Xunta de Galicia e o Concello da Redondela para a mellora da travesía da PO-323, ppqq 0+840 a 1+840.

As obras foron adxudicadas pola Axencia Galega de Infraestructuras por un importe **DUN MILLÓN SETECENTOS OITENTA E UN MIL NOVECENTOS SETENTA E CATRO EUROS CON VINTESEIS CÉNTIMOS DE EURO (1.781.974,26 €)**, ive incluído.

SEGUNDA. COMPROMISOS DO CONCELLO DE REDONDELA

O Concello de Redondela achegará, para financiar as obras, a cantidade de **369.246,56€**, IVE engadido, correspondente ás partidas de renovación das redes de saneamento e abastecemento, con cargo aos orzamentos do concello, de acordo coa seguinte distribución:

Ano	Importe (€)
2017	184.623,28
2018	184.623,28
TOTAL	369.246,56

Este importe será transferido polo Concello da Redondela á Xunta de Galicia en cada unha das anualidades no prazo de 15 días dende que o pagamento sexa requirido pola dita Axencia Galega de Infraestructuras.

Respecto ao compromiso de asunción de obrigas económicas, o concello deberá, con anterioridade á sinatura do convenio, achegar un certificado de existencia de crédito orzamentario suficiente e retido para o fin deste



convenio nos seus orzamentos, así como os compromisos de formalizar o libramento económico no prazo indicado no parágrafo anterior.

TERCEIRA. COMPROMISOS DA AXENCIA GALEGA DE INFRAESTRUTURAS (AXI)

A Xunta de Galicia, a través da Axencia Galega de Infraestruturas, está a executar a actuación "Reforma da travesía da PO-323, do pq 0+840 a 1+840", de clave PO/16/069.06.

CUARTA. COMISIÓN DE SEGUIMIENTO

Constituirase unha comisión de seguimento formada por un representante da Axencia Galega de Infraestruturas e un representante do Concello de Redondela. As súas funcións, entre outras, serán as seguintes:

- Impulsar e avaliar o cumprimento do presente convenio naqueles aspectos técnicos obxecto deste, propoñendo as actuacións que se consideren precisas.
- Propoñer a interpretación, en caso de dúbida, do contido do presente convenio.
- Propoñer ás partes a resolución das posibles controversias que puideran xurdir na aplicación do convenio.

Esta comisión reunirse as veces que se estimen oportunas para o cumprimento do presente convenio. En todo caso a solución das incidencias estará condicionada polas limitacións orzamentarias indicadas na cláusula terceira.



QUINTA. NATUREZA DO CONVENIO

Este convenio ten natureza administrativa e regularase polo establecido no presente convenio e, supletoriamente, polos principios do Real decreto legislativo 3/2011, do 14 de novembro, polo que se aproba o texto refundido da Lei de contratos do sector público, consonte o establecido no artigo 4.2 da antedita lei e a Lei 40/2015 do 1 de outubro de Réxime Xurídico do Sector Público.

O desenvolvemento dos compromisos, obrigas e demais actuacións contidas no presente convenio rexeranse polo establecido nas súas cláusulas.

SEXTA. MODIFICACIÓNS DO CONVENIO

As modificacións formalizaranse mediante *addenda* cos mesmos requisitos e condicións que para a aprobación do convenio, agás aquelas modificacións de carácter técnico aprobadas polo órgano de contratación, de acordo coa normativa de contratos administrativos, que non impliquen a superación do importe máximo reflectido na cláusula primeira do convenio.

SÉTIMA. RESOLUCIÓN

1.- As dúbidas que se presenten na súa interpretación, en caso de discrepancias, serán resoltas, visto o informe da comisión de seguimento, polo presidente da Axencia Galega de Infraestructuras, poñendo fin á vía administrativa.

2.- Serán causas de extinción deste convenio:

- O non cumprimento do seu obxecto.
- A inviabilidade da realización das actuacións descritas neste convenio por causas non imputables ás partes.
- O incumprimento de carácter total ou parcial de calquera das cláusulas do convenio. Entenderase por incumprimento parcial aquel que implica en maior ou menor grao a non consecución dos fins



propios do convenio ou impidan de xeito directo ou indirecto as actuacións previstas nel.

- Denuncia por causas de interese público, a instancia de calquera das partes.

Cada unha das situacións descritas por si soa é causa suficiente de resolución do convenio.

OITAVA. PUBLICIDADE

A sinatura deste convenio suporá o consentimento expreso das partes asinantes para incluír e facer públicos os datos persoais que consten no convenio e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno, (DOG nº 30 do 15 de febreiro) e o Decreto 126/2006, do 20 de xullo, polo que se regula o rexistro de convenios da Xunta de Galicia (DOG nº 149 do 3 de agosto). A Axencia Galega de Infraestruturas publicarano no Diario Oficial de Galicia e na páxina web oficial.

NOVENA. VIXENCIA DO CONVENIO

Este convenio terá efecto a partir da data da súa sinatura. A vixencia manterase ata a entrega das obras no prazo sinalado no documento técnico ou no que, por motivos debidamente xustificados, poidan acordar as administracións afectadas, se así se estimase, tras a correspondente solicitude de ampliación do prazo a través da comisión de seguimento citada na cláusula cuarta.

En todo caso, a efectos económicos, a eficacia do presente convenio estenderase ata o 31 de decembro de 2018; non obstante, seguirá producindo efectos en tanto en canto non se liquiden as obrigas que puideran quedar pendentes.



O presente convenio obriga ao cumprimento do expresamente pactado, someténdose todas as partes ao acordado en todas as estipulacións.

Así o outorgan no lugar e data do encabezamento, subscribindo o presente convenio por triplicado exemplar.

A presidenta da Axencia Galega de
Infraestructuras

O alcalde do Concello de
Redondela

Ethel M^a Vázquez Mourelle

Javier Bas Corugeira